

25, marts 2003

UPA 2003/31

**Inissianik attartorneq pillugu Inatsisartut peqqussutaata  
allanngortinneqarneranik Inatsisartut peqqussutissaattut siunnersuut  
pillugu  
Inatsisartut Attaveqaqatigiinnermut Ineqarnermullu Ataatsimiititaliaata  
ISUMALIUTISSIISUTAA  
siunnersuutip aappassaaneerreqarnerani saqqummiunneqartoq**

Inatsisartut Attaveqaqatigiinnermut Ineqarnermullu Ataatsimiititaliaat suliarinninnermini ukuninnga inuttaqarpoq:

Inatsisartuni ilaasortaq Isak Davidsen, Atassut, siulittaasoq  
Inatsisartuni ilaasortaq Kalistat Lund, Siumut, siulittaasup tullia  
Inatsisartuni ilaasortaq Jens Napaattooq, Siumut  
Inatsisartuni ilaasortaq Johan Lund Olsen, Inuit Ataqaqatigiit  
Inatsisartuni ilaasortaq Palle Christiansen, Demokraatit

Inatsisartut Attaveqaqatigiinnermut Ineqarnermullu Ataatsimiititaliaata Inissianik attartorneq pillugu Inatsisartut peqqussutaata allanngortinneqarneranik Inatsisartut peqqussutissaattut siunnersuut UPA 2003-mi siullermeerneqareermat nassuiaatitai ilanngullugit misissuataarppaa.

### **Apeqqutit**

Ataatsimiititaliaq siunnersuutip oqaluuserineqarneranut atugassanik Attaveqaqatigiinnermut, Avatangiisinut Ineqarnermullu Naalakkersuisoq apeqqutinut arlalinnut akissuteqaqqullugu qinnuigaa. Ataatsimiititaliaq apeqqutaasa Naalakkersuisunilu ilaasortap akissutaasa nuutinneri isumaliutissiisummut matumunnga ilanngunneqarput.

### **Siunnersuutip ilusiligaanera**

Inatsisartut peqqussutaat 2001-imiit marloriarlugu allanngortinneqarnikuuvoq. Taamaalilluni siunnersuutip matuma akuersissutigineqarsinnaanera ilanngullugu Inatsisartut inatsisaannut siullermut tunngatillugu inatsimmut allannguutit pingasuulissapput.

Inatsisartut peqqussutaat arlaleriarlugu allanngortikkaanni, taanna inatsimmik atuisunut paasiuminaatsunngortinneqarsinnaavoq.

Taamaammat Inatsisartut Attaveqaqatigiinnermut Ineqarnermullu Ataatsimiititaliaata Naalakkersuisunut kaammattuutigissavaa, inatsisitigut allannguutigitinniakkat inatsisissatut ataasinngorlugu allatatut nutaatut saqqummiunniarneqassasoq, taamaaliornikkut inissianik attartorneq pillugu maleruagassat atuuttut inatsimmi nutaami ataatsimi katersorneqassammata.

## Siunnersuutip imarisai

Pingaarnerusumik isigalugu siunnersuutikkut iliuuseriniarneqartut amerlanersaat Inatsisartut Attaveqatigiinnermut Ineqarnermullu Ataatsimiititaliaata pissusissamisoortut isigai.

Peqqussummi inuit namminiut kisimik erseqqissaatigineqarmata tamanna iluaqutaassaaq, tamannami ininik attartorneq pillugu peqqussummi siusinnerusukkut erseqqissumik takuneqarsinnaasimangimmat.

Ataatsimiititaliali uniffigaa tamatuma kingunera tassaassasoq ineqarnermut akiliutit qaffasinnerpaaffeqarnissaannik peqqussutip aalajangersagaqarnera namminersortut attartortitsisut Namminersornerullutik Oqartussanut, kommunitut sullissivinnullu allanut isumaqatigiissutaannut atuutinnngimmat. Utaqqiisaasumik ininut pisortat aningaasartuuteqarujussuarternerat eqqarsaatigalugu Inatsisartut Attaveqatigiinnermut Ineqarnermullu Ataatsimiititaliaata tamanna pissutissamisuunngitsutut isigaa.

Ataatsimiititaliap isumaqatigiittup aappassaaneerinnilluni oqaluuserinninnissamut, ineqarnermut akiliutit qaffasinnerpaaffissaat inunnt attartortunut allallu attartorneranni atuuttut pillugit, Naalakkersuisut allannguutissatut siunnersuummik saqqummiussissasut kissaatigaa.

Sananermi kvadratmeterimut ataatsimut akiusussap, iluanaarutissanut akiliuteqarfigisassap qummut killiliivigineqarnissaa siunnersuutip aalajangiiviginiarmagu ataatsimiititaliap iluarisimaarlugu maluginiarpa. Tamanna attartortunut, sananerp nalaani sanaartornermi akiusut qaffasinnerat kisiat tunngavigalugu qaffasissumik ineqarnermut akiliisartunut akikinnerulersitsisussaavoq.

Siunnersuutip kingunerissavaa attartortut qaammatini 12-ini qularnaveeqqusiussatut akiliutinik aningaasartuuteqaratik akilersuisinnaajunnaarnissaat. Tamatumunnga Naalakkersuisut tunngaviliissutigaat ineqarfiit immikkoortuisa erniatigut isertitanik annasaqartarnerat attartortunullu aningaasanik taarsigassarsitsinikkut aqutsinermut immikkut aningaasartuuteqartoqalernissaa.

**Ataatsimiititaliami amerlanerussuteqartut** Atassummeersut, Siumumeersut Inuit Ataqtigiinneersullu oqaatigissavaat, taamatut iliuuseqarneq inunnt aningaasassaleqisooreersunut artukiisussaasoq, akissarissaartulli iserternerminni akiliutaagallartussamik tamakkiisumik akiliiginnartussaasut.

Taamaamat amerlanerussuteqartut qulaani taaneqartut kissaatigaat allannguutissatut siunnersuut atorlugu akiliuteqartitsinermik aaqjissuussineq Naalakkersuisut allannguutissatut siunnersuummi piissagaat.

**Ataatsimiititaliami ikinnerussuteqartup** Demokraatneersup immikkoortumut tassunga Naalakkersuisut akissuteqataat isumaqatigaa, tassungalu tunngatillugu oqaatigissallugu, taarsigassarsiaritneqarsinnaasutut neqeroortigineqartunut, ineqarnermut tunngasuni pioreersunut sanilliullugu, akikinnerusumik taarsigassarsinnaaneq pineqarmat.

**Ataatsimiititaliami amerlanerussuteqartut** Atassummeersut, Siumumeersut Inuit Ataqtigiinneersullu, amerlanerussuteqartut kaammattuutaannut naapertuuttumik Naalakkersuisut allannguutissatut siunnersuutinik saqqummiussereerpata, siunnersuut tapersiivigissavaat.

**Ataatsimiititaliami ikinnerussuteqartoq** Demokraatneersooq siunnersuummut tapersiiumaarpoq, ataatsimiititaliap isumaqatigiittup kaammattuutigisai naapertorlugit inuit attartortut allallu attartornermi pissutsit atugarisaanni ineqarnermut akiliutit qaffasinnerpaaffissaata atuunneranut qulakkeerinnissutaasumik Naalakkersuisut allannguutissatut siunnersuummik saqqummiussereerpata.

Taama oqaaseqarluni Inatsisartut Attaveqaqatigiinnermut Ineqarnermullu Ataatsimiititaliaata inissianik attartorneq pillugu Inatsisartut peqqussutaata allanngortinneqarneranik Inatsisartut peq-qussutissaattut siunnersuut aappasaanigassanngortippaa.

Isak Davidsen  
Siulittaasoq

Kalistat Lund  
Siulittaasup tullia

Jens Napaattooq

Johan Lund Olsen

Palle Christiansen

## Ilanngussaq

*1. Nalinginnaasumik nassuiaatit naapertorlugit Namminersornerullutik Oqartussat inissiaa-taasa 0,6%-iisa missaat peqqussutissatut siunnersuummi m<sup>2</sup>-mut sanaartornermi akimut iluanaarutigineqartussamut 15.000 kr.-inut annertunerpaaffiliinerup kingunerisaanik eqqorneqartussaapput. Sooq m<sup>2</sup>-mut aki 15.000 kr.-imut killilerneqarsimava? (tak. § 11, imm. 1-imi nutaaq)*

Oqaatigineqassaaq Namminersornerullutik Oqartussat inissiaataasa amerlanersaat Danskít Naala-gaaffiannit sanaajusut 1987-imi Namminersornerullutik Oqartussat tigusinnginneranni, taamaattumik pisortat inissiaataat taakku sananeqarneranni akiusoq m<sup>2</sup>-mut ataatsimut 15.000 kr.-it ataanniippoq.

Kalaallit Nunaanni kommunit inissialiarisagaasa m<sup>2</sup>-mut ataatsimut akia nunamut tamarmut agguaqatigiissillugu 15.000 kr.-it missaanniippoq. Taassuma killiliunneranut taanna tunuliaqutaasut aapparaat. Tunuliaqutaasup aappaa minnerpaamillu taama pingaaruteqartigisoq tassaavoq aningaasaliissutinit iluanaarutissat, sanaartornermi akissaajaatit tunuliaqutaralugit naatsorsorneqartartut piginnittumullu tutsinneqartussat, ineqarnermut akiliutinik akuerineqarsinnaasumit annerusumik qaffaassutaannginnissaasa qularnaarneqarnissaa.

*2. Nr. 1-imut akissummumut ilanngullugu ataatsimiititaliap erseqqinnerusumik paaserusuppaa qummut killigititaq 14.000 kr.-imut imaluunniit 16.000 kr.-imut aalajangiunneqarsimagaluarpat, tamanna aningaasaqarnikkut qanoq kinguneqaateqassanersoq.*

M<sup>2</sup>-mut ataatsimut 16.000 kr.-it killiliunneqarsimagaluarpata taassuma nassatarissagaluarpaa ullumikkumut naleqqiullugu Namminersornerullutik Oqartussat 455 kr.-inik annaasaqaateqarnerat, tassa Namminersornerullutik Oqartussat ullumikut attartortittakkanik inissarsuaateqarmata sisamanik katillugit 1.784,6 m<sup>2</sup>-inik angissuseqartunik, taakku sananeqarnerminni akiat m<sup>2</sup>-imut ataatsimut 16.000 kr.-init qaffasinnerummat.

Piffissaliussap sivikinnera pissutigalugu kommunini nikingassuterpiaasup naatsorsornissaanut paasissutissanik katersuinissaq ajornarsimavoq. Misissuinerilli pisimasut tunuliaqutaralugit ilisimaneqarpoq kommunit minnerpaamik inissiaataat katillugu 25.275 m<sup>2</sup>-inik angissuseqartut, taakku sananeqarnerminni akiat m<sup>2</sup>-mut 15.000 kr.-init qaffasinneruvoq, tamatuma nassataraa allannguutissatut siunnersuutip kingunerisaanik aningaasaliissutinit iluanaarutissaraluanit 458.793 kr.-it annaasussaassagaat. Tamanna tunngavigineqassappat m<sup>2</sup>-imut ataatsimut agguaqatigiissillugu 18,15 kr.-it kommunit annaassavaat.

Killiliussaq m<sup>2</sup>-imut ataatsimut 15.000 kr.-iniit 14.000 kr.-inut appartinneqarpat naatsorsuinermit tunngaviusup 1.000 kr.-ip 1,5%-ia m<sup>2</sup>-imut ataatsimut 15 kr.-it annaassavaat. Oqarutta 15.000 m<sup>2</sup>-it sananerannut akissaajaatit m<sup>2</sup>-imut ataatsimut 14.000 kr.-init qaffasinnerusut kisianni m<sup>2</sup>-imut ataatsimut 15.000 kr.-init appasinnerullutik, taava kommunit annaasassaat 225.000 kr.-inut nalilerneqarsinnaapput.

Akerlianilli killiliussaq 16.000 kr.-utinneqarpat oqaruttalu 15.000 m<sup>2</sup>-it sananeqarnerat m<sup>2</sup>-imut ataatsimut 15.000 kr.-init qaffasinnerusooq kisianni m<sup>2</sup>-imut ataatsimut 16.000 kr.-it ataassimallugit kommunit annaasassaat 233.793 kr.-inut nalilerneqarsinnaapput (458.793 kr. minus 225.000 kr.).

### *Illassutitut apeqqut 1.*

*Peqqussutissatut siunnersuutikkut sananermi kvadratmeterimut akiusut, iluanaarutissanik akileqquneqartussat, 15.000 kr.-inut qaffasinnerpaaffissalernerqarput. Tamatumunnga atatillugu Namminersornerullutik Oqartussat kommunillu annaasaqaatigisassaat Naalakkersuisut nassuiaatigaat. Attartortunut ataasiakkaanut kinguneqaatissat pillugit paasissutissanik erseqqinnerusunik pissarsinissaq Inatsisartut Attaveqaatigiinnermut Ineqarnermullu Ataatsimiititaliaata kissaatigaa. Inissianik attartortut qassit 15.000 kr.-inik killiliinikkut pitsaaqutissarsitinneqassappat?*

Aningaasaliissutinit iluanaarutissat kommunit/Namminersornerullutik Oqartussat annaasassaat ataatsimut isigalugu ineqarnermut akiliutinut attartortunut oqilisaassissutaasussanut naapertuupput. Namminersornerullutik Oqartussat inissiaataanni attartortittakkani attartortut 30 missaanniittut ukiumut ineqarnermut akiliutiminni m<sup>2</sup>-imut ataatsimut 14 kr.-inik appaavigineqassapput. Taakku inissiamut 70 m<sup>2</sup>-imut qaammammut 82 kr.-it missaannik oqilisaatinut naapertuupput.

Kommunit eqqarsaatigalugit allannguneq attartortunut 360 missaannut eqquissangatinneqarpoq, taakku ukiumut ataatsimut ineqarnermut akiliutiminni m<sup>2</sup>-mut ataatsimut agguaqatigiissillugu 18,15 kr.-inik appaavigineqassapput. Oqarutta attartortut taakku agguaqatigiissillugu inissiami 70 m<sup>2</sup>-imi najugaqartut peqqussutissatut siunnersuutikkut qaammammut 106 kr.-ingajannik oqilisaaffigineqassapput.

### *Illassutitut apeqqut 2.*

*Killiliinerlu 14.000 kr.-inut imaluunniit 16.000 kr.-inut angissusilerneqarpat inissianik attartortut qassit pitsaaqutissarsitinneqassappat?*

Killiliussap 14.000 kr.-inut imaluunniit 16.000 kr.-inut allanngortinneqarneratigut attartortut pineqartussat qassioqqissaarnerat pillugu paasissutissanik Naalakkersuisut pigisaqanngillat. Kisianni paasissutissat pigineqartut tunuliaqutaralugit m<sup>2</sup>-imut ataatsimut 16.000 kr.-it killiliunneqarpat Namminersornerullutik Oqartussat inissiaataanni attartortittakkani attartortut 30 missaat ullumikkumut naleqqiullugu 455 kr.-inik, qaammammut 1 kr.-ip missaanut naapertuuttumik, oqilisaassivigineqarnissaat naatsorsuutigineqarsinnaavoq.

Killiliussaq 16.000 kr.-inut aalajangerneqarpat, kommunillu inissiaataasa attartortittakkat 15.000 m<sup>2</sup>-iusut sananeranni akissaajaatit m<sup>2</sup>-imut ataatsimut 15.000 kr.-init amerlaneruppata kisianni m<sup>2</sup>-imut 16.000 kr.-inik appasinnerullutik, taava ineqarnermut akiliutip qaffariaataa tamarmiusooq 233.793 kr.-inut (458.793 kr. minus 225.000 kr.) naatsorsuutigineqarsinnaavoq, taakku inissiamut 70 m<sup>2</sup>-imut ukiumut m<sup>2</sup>-imut ataatsimut 15,59 kr.-imut imaluunniit qaammammut 90 kr.-imut naapertuupput.

*3. Manna tikillugu qaammatinu 12-ini qularnaveeqqusiissummik saniatigut aningaasartuutitaqanngitsumik akilersuisooqarsinnaasimavoq. Taamatut kiffartuussinermut maanna 1.100 kr.-inik akiitsullu 1.000 kr.-it*

*sinnersimagaangatigit 2%-inik ilasanik akiliuteqartussanngornermi suna tunngaviuva, tak. § 17, imm. 2 nutaaq.*

Qularnaveeqqusiissummik naafferartumik akilersuineq aningaasartuutitaqanngisaannarsimavoq. Qularnaveeqqusiissutit attartortumit erngerlugu (anigaasanngorlugu) akilerneqannginnerat imaappoq najugaqatigiiffiup pineqartup najugaqarfigisaata akiliussigallartuunera taamaattumillu ernianit isertitassaraluanik annaasaqarnera. Tamatuma ajornerpaatut nassatarisinnaavaa attartortut allat annaasaqaammum matussusiinerat qularnaveeqqusiissutit ataatsip annaanerattut annertussuseqartumik. Aammattaaq eqqaasitsissutigineqassaaq najugaqatigiiffimmi inissiap ingerlanneqarneranut akissaajaatinut tamanut akileeqqusissut ataasiinnarmut ingerlatinneqarsinnaammatt, tassalu attartortumut.

Siunnersuutigineqarpoq attartortut siunissami toqqarsinnaassagaat qularnaveeqqusiissutit nammineq aningaasaatit atorlugit aningaasanngorlugu akilertalissagaa, aningaasat aningaaserivimmit attavigisaminit attartussagai imaluunniit aningaasat "attartortunit allanit" attartussagai. Qularnaveeqqusiissutit naafferartumik akilersornissaat allaffissornertaqarpoq makkuninnga, pilersitsineq, akileeqqusineq nukingisaarinerlu, naleqqutinngilarlu taakkununnga akissaajatit attartortunit allanit ataatsimoortumik matussusertinnissaat. Taamaattumik kiffartuusseriaatsit arlallit Inissiaatileqatigiiffiup nalinginnaasumik ingerlatsineranit peertiterneqassapput, tamakkulu siunissami kiffartuusissutigineqarnissaat immikkut akilerneqartalissalluni. Kiffartuussinissamik taamaattumik ujartuisut tamakkununnga akiliisarnissaat pissusissamisuuqinnarpoq.

*4. Kukkunersuineranut Ataatsimiititaliaasimasoq Nunatta Karsiata 2001-imut naatsorsuutai pillugit isumaliutissiissummini (qupperneq 116-imi) imatut inassuteqaateqarpoq: "Utaqqiisaasumik ineqartitsinerup Namminersornerullutik Oqartussanut annertunerujartuinnartumik ajornartorsiutaaleriartornerata qanoq iliuuseqarfigineqarsinnaanera pillugu naalakkersuinerup tungaanit itisilerutaasumik isumaliutersuutigineqarnissaa, tassungalu ilanngullugu aningaasaqarnikkut misissueqqissaarnerit ingerlanneqarnissaat, kiisalu inissianik immikkoortitseriaatsimut inissiaqartinneqartussaataaannermullu apeqqutit kiisalu apeqqutit allat inissianik agguaasisarnermut attuumassuteqartut naalakkersuinnikkut naliliiffigineqarqinnissaat. Naalakkersuinnikkut nalilersueqqinnermi ineqarnermut tunngatillugu naalakkersuinnikkut ineqarnermut politerisap anguniagaata nassatarisaannik siunissamut qanittumut ungasinnerusumullu aningaasatigut kinguneqaatissat itisilerlugit misissuiffigeqqissaarneqarnerat ilaatinneqartariaqarpoq."*

*Inatsisartut Attaveqatigiinnermut Ineqarnermullu Ataatsimiititaliaata sulisunut utaqqiisaagallartumik inigititattartortitsinermit peqqussummi ilaatinneqannginnerat ilisimaaraa, qulaanili taaneqartut aallaavigalugit Namminersornerullutik Oqartussani tikisitatut sulisut taarseraannerujussuannut atatillugu sulisunut inissiaqartitsineq sulisut taarseraannerannut qanoq annertutigisumik sunniuteqartarnera naliliivigineqarsimanersooq erseqqinnerusumik paaserusuppara. Apeqqut tamanna attartortitsinermit peqqussummi inissiaqarfinnik aalajangersimasunik kissaateqarsinnaajunnaarnermik aammalu inissianik aalajangersimasunik piunasaqarsinnaajunnaarnermi aallaaveqarpoq.*

Apeqqummut saqqummiunneqartumut atatillugu pingaarpoq erseqqissassallugu utaqqiisaasumik ineqartitsisarnermut tunngasut Inissianik attartorneq pillugu Inatsisartut peqqussutaanni pineqartunut ilanngimmata. Matumani pineqartoq isumaqatigiissutitigut Namminersornerullutik Oqartussat sulisitsisutut aamma sulisorisat kattuffiisa akornanni isumaqatigiissutaasartutitigut maleruagassaqartitaavoq.

Namminersornerullutik Oqartussat sulisussarsiornermi ajornartorsiutaasa aqqiivigeriarnissaat imaluunniit sulisunik tigumminiinnarniarnissaat Inissianik attartorneq pillugu Inatsisartut peqqussutaatigut ingerlatsivigineqanngillat, taamaattumik apeqqutit saqqummiunneqartoq

akineqarsinnaanngilaq. Taamaakkaluartoq qularutissaanngilaq ineqarnermut tunngassutillit atorfeqartitap toqqissisimanissaanut aamma pingaaruteqarsinnaammata.

Tapertaliullugu nalunaarutigineqarsinnaavoq utaqqiisaasumik ineqartitsisarnermut tunngasut arlalitsigut suliniuteqarfigineqalereersut, ilaatigut utaqqiisaasumik ineqartitsinermut akissaaajaatit ikilisinnaarlugit aammalu atorfeqartitap inissaqartinneqartussaataasup sapinngisamik piaartumik ataavartumik inissaminik innersuunneqarsinnaalersinniarlugu, taamaalillunilu nalinginnaasumik inuuneqalersinnaanissaa qularnaarniarlugu.

*5. § 1, imm. 4-mi nutaami peqqussummi aalajangersarneqarpoq attartortitsinerit inunnut ataasiakkaanut tunngasut kisimik pineqartut. Maleruagassap tamatuma kingunerissavaa Namminersornerullutik Oqartussanut kommuninullu (sulisorisanut utaqqiisaagallartumik) inissianik inuinnarnit pigineqartunit attartortitsinerit inatsisit avataanni inissisimalernerat. Tamatuma ilaatigut kingunerisaanik peqqussummi inissianut akiliutip qaffasinnerpaaffissaatut aalajangersakkanik attartortitsisup malinnittussaanginnera, soorluttaaq attartornermut peqqussummi attartortut illersorneqarnissaannik siunertaqartumik maleruagassat atuutissanngitsut.*

*Peqqussutissatut siunnersuutip nalinginnaasumik nassuiaatitaani nutaamik aalajangersakkamut tunngasumik imaattumik allassimasoqarpoq:*

*"Ilaanneeriarluni nalornissutigineqartarsimavoq inatsisartut peqqussutaat sunut atorne-qassanersoq. Soorlu arlallit kukkullutik isumaqartarsimapput inatsisartut peqqussutaat aamma atuuttoq ingerlatseqatigiiffiit imaluuniit suliffeqarfiit akornanni attartortitsinermut. Taamaattoqanngilarli. Inatsisartut peqqussutaanni taamaallaat pineqarput inuit attartortuusut."*

*Taamaalilluni isumaqarnarpoq attartornermut peqqussut, aamma siunnersuutip matuma akuersissutigineqarsinnaanera sioqqullugu attartortitsinernut inunnit ataasiakkaanit attartorneqartunut taamaallaat atuuttutut Naalakkersuisunit isigineqarsimasoq. Taamatut isumaqarsimaneq attartortitsinermi peqqussutit oqaasertaani aammalu inatsisip nassuiaatitaani tunngavissaqarsorinartinneqanngilaq. Taamaattumik inatsisartut peqqussutaata maannakkut atuuttup attartortunut aalajangersimasunut inuttaqanngitsunut atuutinninneranik isiginninnini sooq Naalakkersuisuni ilaasortap aalajangiuisimaannarneraa itisiliivigalugu paasissutissiissutigineqassasoq ataatsimiititaliap kissaatigaa. Paasinninnerminut naammattumik tapersiutaasunik Naalakkersuisuni ilaasortaq tunngavissaalatsitsippat inatsisitigut tunngavigisanik allannguinerup matumani peqarnera paatsoorneqarsinnaanngitsumik erseqqissaatigineqassasoq ataatsimiititaliap kissaatigaa.*

Oqaatigineqareersutut Inissianik attartorneq pillugu Inatsisartut peqqussutaanni siusinnerusukkut erseqqissumik takuneqarsinnaasimanngilaq taanna attartortitsinernut inunnit ataasiakkaanit attartorneqartunut taamaallaat atuunnersoq. Taamaakkaluartoq taamaattuarsimavoq, attartortitsisartullu taanna malillugu iliuseqartarsimapput. Kiisalu inatsisip oqaasertaani arlaleriarluni atuarneqarsinnaavoq attartortoq tassaasoq inuttut isigineqarsinnaasoq, taamaanngippammi inatsisip oqaasertai arlaleriarluni nalinginnaasumik oqaatsinut atortakkatsinnut assortuutissapput, assersuutigalugu:

- § 29, imm. 1, "¼attartortup illoqataa (inoqutaa)¼" inuttut isigineqarsinnaasumut tunngatil-lugu.
- § 29, imm. 4, "Attartortup attartortitsisoq pisariaqartinneqartumik isumaqatigiissuteqarfigeq-qaarnagu inissiaq piffissaanngitsukkut qimassanngilaa." Inuttut isigineqarsinnaasoq timita-limmik inissiamut isertersinnaananiluunniit qimatsisinnaassanngilaq.
- § 31 "Attartortup taassumalu inoqutaasa kiisalu inuit¼" inuttut isigineqarsinnaasumut tunngatil-lugu.

- § 34 "Attartortoq attartortitsisoq siumut allakkatigut akuersissuteqarteqqaarlugu isumagininnermi inatsisini aalajangersakkat malillugit iluaqusersuutini ikkussuisinnaatitaavoq.", aamma inuttut isigineqarsinnaasumut tunngatillugu.
- § 40 "Attartortup toqunerani aapparisa qimataasoq atugassarititaasut atuinnaarlugit attartornermik ingerlatseqqiinnarsinnaatitaavoq. Inuttaaq inissiamik attartornermut isumaqatigiis-summi atsioqataasimanngitsoq kisiannili sivikinnerpaamik ukiuni marlunni attartortumut illoqataasimasooq taamatut pisinnaatitaaffeqarpoq.", taakku tamaasa inuttut isigineqarsinnaasumut tunngatillugu.
- § 41 "Attartortoq averuserpat imaluunniit avippat imaluunniit attartortup aappariinnera ato-runnaarsinneqarpat, pisariaqassappat akuersissuteqarnikkut eqqartuussinikkulluunniit aappa-riit arlaat inissiamik attartortuunnarsitaanersoq aalajangerneqassaaq."

Inissianik attartorneq pillugu peqqussummi attartortup inuttut isigineqarsinnaasuunissaanut tunngasumik atuagassaqaanngilaq. Assersuutigalugu piginnaatitsissummut imaluunniit atsiorsinnaatitaasumut tunngasumik eqqaasaqartoqaanngilaq.

Kiisalu Namminersorerullutik Oqartussat inissiaataasa attartortittakkat attartortinneqarnerat pillugu kaajallaasitani nutaannginnerusuni (atuukkunnaarnikuni), Kaajallaasitaq imm. 7. nr. 31, § 2-mi atuarneqarsinnaavoq "Kommunit Namminersorerullutik Oqartussat sinnerlugit inunnik nammineersinnaatitaasunik pissutissaatitaasunillu eqquutsitsisunik attartornissaq pillugu isumaqatigiissuteqarsinnaapput: 1/4" Kaajallaasitaq Inissianik attartorneq pillugu Inatsisartut peqqussutaata siulliup siuleraa.

*6. Peqqussutissatut siunnersuutip aningaasatigut kingunerisassaasa nassuiaatitaani imatut allassimasoqarpoq: "Kommunit Nunattalu Karsiata ilimagisariaqarpaat akiliigallassutit pillugit aaqqissuussinerup eqqortinneqaannginneranut tunngatillugu annaasaqarnissartik."*

*Naalakkersuisut Inatsisilerinnermut allaffia siunnersuummik inatsisit tungaannit naliliiffi-ginninnermini imatut oqaaseqaateqarpoq: "Annaasat aningaasartuutilluunniit annertussusaat erseqqissumik nalunaarsorneqaanngillat. Peqqussutissatut siunnersuutip kinguneqaatissaat inatsisartunit nalilerluarneqarsinnaanissaat periarfissikkumallugu, annaasassatut aningaasartuutissatullu ilimagineqartut annertussusaat sapinngisaq naapertorlugu nalunaarsorniarneqarnissaat pisariaqassaaq."*

*Taamaakkaluartorli aningaasaqarnikkut kinguneqaatissat nassuiaatini erseqqissaatigineqarsimanngillat. Tamanna tunngavigalugu Inatsisartut Attaveqaqatigiinnermut Ineqarnermullu Ataatsimiititaliaata attartortitsinermut qularnaveeqqutinut naammassineqaanngitsoortunut annaasassat qanoq amerlatigisussatut ilimagineqarnersut paaserusuppa.*

Pineqartut immikkoortinneqarnissaat pingaaruteqarpoq.

- Namminersorerullutik Oqartussat kommunillu attartortitsisuupput taamaattutullu missingersuusiortussaallutik ineqarnermullu akiliutissanik akileeqqusisussaallutik.
- A/S Inissiaatileqatigiiffik INI ingerlatseqatigiiffiivoq ingerlatsisoq inissianik piginnittuunani.
- Taamaattumik Namminersorerullutik Oqartussat kommuniluunniit ineqarnermut akiliutissap akilerneqaannginneratigut imaluunniit qularnaveeqqutit naafferarlugit akilersorneqarnissaannik eqquutsitsisoqaannginneratigut annaasaqaatimik matussutissaannut akissaajaatissatut naatsorsuutigisat ilanngutarpaat.

Kisiannili Namminersorerullutik Oqartussat kommunillu inissiaataat najugaqaqatigiiffinnut aningaasaqarnikkut namminersortunut agguataagaapput. T.i. najugaqaqatigiiffiit ataasiakkaarlutik namminerisaminnik missingersuusiarput. Missingersuusiani taakkunani attartortitsisup (Namminersorerullutik Oqartussat imaluunniit kommunit) ineqarnermut akiliutit akilerneqaannginnerisigut imaluunniit qularnaveeqqutit naafferarlugit akilersorneqarnissaannik eqquutsitsisoqaannginneratigut annaasaqaatimik matussutissaannut akissaajaatissatut naatsorsuutigisat ilanngutarpaat.

Siuliiniittut malillugit najugaqaqatigiiffimmut akiligassiissutit tamarmiusut attartortunit najugaqaqatigiiffimmi pineqartumi najugaqartunit matussuserneqartussaapput. Tamanna aamma atuuppoq annaasanut qularnaveeqqutit naafferarlugit akilersorneqarnissaannik sumiginnaasoqarneratigut pinngorsimasinnaasunut. Nalunaarutigineqarsinnaavoq paasisimasat tunngavigalugit ukiumut ataatsimut m<sup>2</sup>-mut ataatsimut 10 kr.-it attartortup qimatsineratigut, attartortoqanngikkallarneratigut, ineqarnermut akiliutit akilerneqannginnerisigut aammalu qularnaveeqqutit naafferarlugit akilersorneqarnissaannik sumiginnaasoqarneratigut annaasanut matussutissatut missingersuutigineqartartut. Aningaasat inissiamut 70 m<sup>2</sup>-imut qaammammut 58 kr.-inut naapertuupput.